

**BASES REGULADORAS PARA A CONCESIÓN DE SUBVENCIONES A CLUBS DEPORTIVOS
DA PROVINCIA DE PONTEVEDRA QUE DESENVOLVAN A SÚA ACTIVIDADE PRINCIPAL
NO ÁMBITO INFERIOR AO ESTATAL PARA O ANO 2026**

O deporte e a actividade física constitúen unha dimensión esencial para a calidade de vida da cidadanía pola súa contribución ao benestar persoal e colectivo, á cohesión social, á transmisión de valores e ao impulso económico e territorial. O modelo deportivo atópase, ademais, en continua evolución, con cambios que están a incrementar a práctica deportiva e a súa proxección social, polo que resulta necesario reforzar as medidas públicas que faciliten o acceso e fomenten a participación da poboación en condicións de igualdade.

A Deputación de Pontevedra, a través do Servizo de Deportes, mantén como obxectivo estratéxico o fomento do deporte e o apoio ao tecido deportivo da provincia, no marco da súa orientación e compromiso institucional coa “**provincia do deporte**”, especialmente no ámbito do deporte de base e dos clubs deportivos, que sosteñen unha parte fundamental da práctica físico-deportiva no territorio.

Neste marco, a institución provincial impulsa unha liña de subvencións dirixida a clubs deportivos sen ánimo de lucro da provincia de Pontevedra, co fin de colaborar no financiamento dos gastos derivados da súa actividade habitual de ámbito inferior ao estatal, e incorpora unha liña específica para os clubs deportivos que participan cun equipo na competición de fútbol Preferente Galicia.

Con estes antecedentes, considérase oportuno darlle continuidade a esta liña de axudas, xa que constitúe un instrumento relevante para desenvolver e fomentar o deporte de base e favorecer a práctica físico-deportiva como elemento de saúde, inclusión, participación e ocupación activa do tempo de lecer no conxunto da provincia.

Desde o punto de vista competencial, de acordo coa Lei 3/2012, de 2 de abril, do deporte de Galicia, correspóndelles ás deputacións fomentar, promover e difundir o deporte na provincia, así como facilitar a súa práctica, coa finalidade de contribuír á mellora da condición física e ao benestar da poboación. Do mesmo xeito, na Lei 39/2022, de 30 de decembro, do deporte, recoñécese o carácter esencial do deporte e da actividade física e o dereito de todas as persoas á práctica deportiva e salientase o papel das administracións públicas na súa promoción.



Así mesmo, no artigo 36.1.d da Lei 7/1985, de 2 de abril, reguladora das bases do réxime local, establécese como competencia propia das deputacións provinciais a cooperación no fomento do desenvolvemento económico e social e na planificación no territorio provincial; e, no ámbito autonómico, no artigo 109.1.d da Lei 5/1997, de 22 de xullo, de Administración local de Galicia, atribúenselles ás deputacións o fomento e a administración dos intereses peculiares da provincia, e no 118.d, entre outras funcións, a organización de actividades cuxa finalidade sexa o fomento da cultura, da educación e do deporte.

En virtude do exposto, e ao abeiro do establecido na Lei 38/2003, de 17 de novembro, xeral de subvencións (LXS), na Lei 39/2015, de 1 de outubro, do procedemento administrativo común das administracións públicas (LPACAP), na Ordenanza xeral de subvencións da Deputación de Pontevedra e na demais normativa aplicable, convócase esta liña de subvencións destinadas a clubs deportivos da provincia de Pontevedra que desenvolven a súa actividade principal no ámbito inferior ao estatal e, especificamente, aos clubs deportivos cun equipo en fútbol en Preferente Galicia, para o ano 2026, de acordo coas seguintes

BASES

Primeira. Obxecto

Estas bases teñen por obxecto regular o procedemento de concesión, en réxime de concorrencia competitiva, de subvencións destinadas a clubs deportivos da provincia de Pontevedra que participan con algún equipo ou deportista en competicións e actividades de ámbito inferior ao estatal e a clubs que estean presentes na competición de fútbol Preferente Galicia.

A finalidade destas axudas é colaborar no financiamento dos gastos derivados da actividade deportiva das entidades beneficiarias durante o período subvencionable que determinen as entidades no momento da solicitude, que poderá referirse á tempada deportiva 2025-2026 e/ou ao ano natural 2026, segundo a modalidade.

Segunda. Entidades beneficiarias

Poderán beneficiarse desta convocatoria os clubs deportivos sen ánimo de lucro, legalmente constituídos e con domicilio fiscal na provincia de Pontevedra, que participen en competicións



e actividades de ámbito inferior ao estatal e os que participen na competición de fútbol Preferente Galicia, conforme a unha das seguintes liñas:

- **Liña 1:** participación en competicións e actividades de ámbito inferior ao estatal.
- **Liña 2:** participación na competición de fútbol Preferente Galicia.

Non poderán beneficiarse as entidades nas que conorra algunha das prohibicións para obter a condición de beneficiaria previstas no artigo 13 da LXS, así como nas disposicións concordantes da normativa autonómica de aplicación.

Tampouco poderán resultar beneficiarias aquelas entidades que teñan pendente de xustificar, con prazo vencido, axudas concedidas no exercicio anterior no marco do mesmo programa.

No caso das entidades beneficiarias da liña 1, a acreditación de atoparse ao corrente no cumprimento das obrigas tributarias coa Axencia Estatal de Administración Tributaria (AEAT), coa Facenda autonómica, coa Tesourería Xeral da Seguridade Social e coa Deputación de Pontevedra poderá realizarse mediante a declaración responsable incluída na solicitude, sen prexuízo das comprobacións que poida efectuar a Deputación e da posibilidade de requirir, no seu caso, a presentación das certificacións correspondentes.

Terceira. Financiamento e distribución orzamentaria

A concesión das subvencións reguladas nestas bases estará condicionada á dispoñibilidade orzamentaria e concederase con cargo á aplicación 26/340.3410.489.23 do Orzamento da Deputación correspondente ao exercicio de 2026, por un importe máximo total de setecentos mil euros (700.000,00 €).

A distribución inicial do crédito por liñas será a seguinte:

- Liña 1, para clubs deportivos cuxa actividade principal se desenvolva no ámbito inferior ao estatal640.000,00 €.
- Liña 2, para clubs deportivos que participen cun equipo na competición de fútbol Preferente Galicia60.000,00 €.



Esta cantidade poderase incrementar nun máximo dun 25 % do importe total con base nas circunstancias previstas no artigo 58.2 do Regulamento da LXS, aprobado polo Real decreto 887/2006, de 21 de xullo, e no artigo 31 da Lei 9/2007, de 13 de xuño, de subvencións de Galicia (LSG).

O importe deste aumento dependerá dunha xeración, ampliación ou incorporación de crédito. A efectividade da contía adicional queda condicionada á declaración de dispoñibilidade do crédito como consecuencia das circunstancias antes sinaladas e, no seu caso, logo da aprobación da modificación orzamentaria que proceda, nun momento anterior á resolución da concesión da subvención. Este incremento deberá publicarse antes da resolución de concesión nos mesmos medios que a convocatoria e indicarse o crédito final dispoñible e a distribución definitiva. Este anuncio non implicará a apertura de prazo para presentar novas solicitudes nin o inicio dun novo cómputo de prazo para resolver.

En ningún caso, a suma total das axudas concedidas poderá superar o orzamento máximo previsto nestas bases ou, de ser o caso, nas súas posibles modificacións.

Cuarta. Réxime xurídico

As subvencións reguladas nestas bases tramitaranse en réxime de concorrencia competitiva, de conformidade cos principios de publicidade, transparencia, obxectividade, igualdade e non discriminación, eficacia no cumprimento dos obxectivos fixados e eficiencia na asignación e utilización dos recursos públicos.

O procedemento rexerese por estas bases e pola normativa básica estatal en materia de subvencións, pola normativa autonómica de subvencións de Galicia, pola Ordenanza xeral de subvencións da Deputación de Pontevedra vixente e pola normativa xeral de procedemento administrativo e réxime xurídico do sector público.

Así mesmo, no relativo á ordenación da actividade físico-deportiva, ao réxime e funcionamento das entidades deportivas e ao desenvolvemento da práctica deportiva no ámbito territorial correspondente, será de aplicación a normativa deportiva estatal e autonómica vixente, así como as disposicións regulamentarias e demais normas de desenvolvemento que resulten pertinentes en función da natureza das actuacións subvencionadas.



En todo o non previsto nas normas anteriores, aplicaranse de forma supletoria as restantes disposicións do ordenamento xurídico que resulten pertinentes segundo a natureza das actuacións.

Quinta. Gastos subvencionables

Consideraranse gastos subvencionables aqueles que, de maneira indubidable, respondan á natureza da actividade subvencionada, resulten estritamente necesarios para a súa realización e se realicen dentro do período subvencionable elixido pola entidade na solicitude, que deberá optar entre a tempada deportiva 2025-2026 (cando a modalidade sexa de tempada partida) ou o ano natural 2026 (cando a modalidade sexa anual); esta elección terá carácter vinculante para a imputación e xustificación dos gastos e non se admitirán gastos correspondentes a un período distinto ao seleccionado.

En particular, serán subvencionables os gastos directamente vinculados á actividade físico-deportiva da modalidade ou modalidades que desenvolva a entidade, de acordo coa relación de gastos subvencionables que figura a continuación:

- **Gastos federativos.** Os que correspondan a gastos emitidos polas federacións deportivas ou similares da actividade deportiva subvencionada.
- **Gastos de competición e adestramento.** Os correspondentes a desprazamentos, aloxamento, manutención, participación, alugueiro de instalacións deportivas, quilometraxe ou calquera outro necesario para asistir ou participar nas competicións ou nos adestramentos da actividade deportiva subvencionada.
- **Gastos de persoal.** Os relacionados con soldos, salarios ou retribucións, unicamente das e dos deportistas, técnicos, adestradores ou calquera outro axente necesario para a práctica da actividade deportiva subvencionada.
- **Gastos de material deportivo.** Os que correspondan á vestimenta e ao equipamento deportivo non inventariable, así como á reparación e ao mantemento do material deportivo necesario para a práctica deportiva subvencionada.
- **Gastos sanitarios.** Os relacionados coa saúde das e dos deportistas no desenvolvemento da actividade deportiva subvencionada.



Outras normas para ter en conta:

- Quedan excluídos, entre outros, os gastos derivados de seguros, asesorías, telefonía, ITV, así como calquera outro que non teña relación coa práctica da actividade deportiva subvencionada.
- En ningún caso se admitirán gastos cuxos prezos sexan superiores aos de mercado.
- Salvo disposición expresa na que se indique o contrario, poderase considerar como gasto subvencionable aquel feito e xustificado, aínda que non estea pagado, antes de presentar a xustificación, sempre que se realice no prazo máximo dun (1) mes desde que se lle aboe a subvención á persoa beneficiaria. Este aspecto comprobarase cando se faga o control financeiro.
- Non se considerarán gastos subvencionables os que superen o importe de novecentos euros (900,00 €) e non se paguen por medio dunha entidade financeira. Así mesmo, cando se trate de persoas beneficiarias que non contén con contabilidade, tampouco se considerarán subvencionables aqueles que non se realicen por medio dunha entidade financeira.
- En caso de que se subvencionen actividades non profesionais, servirá de xustificante o recibo no que se acredite a identificación da persoa beneficiaria da subvención e do suxeito que desempeña a actividade, o concepto, a data, o importe e o xustificante de que se realizou, se procede, a correspondente retención fiscal.
- En caso de compensacións por desprazamentos en vehículos privados, estableceranse sobre a base das tarifas aboadas por quilómetro, segundo a normativa vixente.

Sexta. Lugar de presentación de solicitudes

As solicitudes presentaranse obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, <https://sede.depo.gal>, de acordo co establecido no artigo 14.2 da LPACAP.

Soamente se admitirá unha solicitude de subvención por cada entidade solicitante.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de



identificación baseados en claves concertadas (sistemas de usuario e contrasinal) e certificados electrónicos (incluído o DNle).

Sétima. Prazo de presentación de solicitudes

O prazo de presentación de solicitudes será de vinte (20) días hábiles, contados a partir do día seguinte ao da publicación da convocatoria e do seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).

Oitava. Comprobación de datos

Para tramitar este procedemento consultaránse automaticamente os datos incluídos nos documentos elaborados polas administracións públicas que se detallan a continuación:

- NIF das persoas xurídicas solicitantes.
- DNI ou NIE da persoa representante legal da entidade deportiva.
- Domicilio fiscal da entidade solicitante.
- Certificado de estar ao corrente das obrigas tributarias coa AEAT, coa Facenda autonómica galega, coa Seguridade Social e coa Deputación de Pontevedra.

No caso de que as persoas interesadas se opuxesen ás devanditas consultas, deberán indicalo no cadro habilitado no formulario de inicio e achegar os documentos correspondentes.

No suposto de imposibilidade material de obter o documento, o órgano competente poderá requirirle á persoa interesada a súa presentación ou, no seu defecto, a acreditación por outros medios dos requisitos aos que se refire o documento antes de formular a proposta de resolución.

Novena. Documentación

As entidades solicitantes presentarán, xunto coa solicitude, a seguinte documentación:

- **Certificado ou certificados federativos (anexo I).** Certificación oficial expedida pola federación ou federacións correspondentes na que se detallan os criterios de valoración específicos e previstos nas bases.



- Aquelas entidades de modalidades deportivas que desenvolvan a súa actividade no ano natural poderán presentar, xunto coa solicitude, unha declaración xurada na que se detallan os criterios de valoración específicos e previstos nas bases. En todo caso, deberán presentar o certificado federativo no prazo de dez (10) días desde a notificación da proposta de resolución provisional. En caso de presentar un menor número de licenzas, reducirase o importe da subvención proporcionalmente (de achegarse máis licenzas, teranse en conta as declaradas coa solicitude).

A documentación complementaria deberá presentarse electronicamente. As persoas interesadas responsabilizaranse da veracidade dos documentos que acheguen. Excepcionalmente, a Administración poderá requirir a exhibición do documento orixinal para cotexalo coa copia electrónica presentada.

Se algunha das persoas interesadas entregase a documentación complementaria presencialmente, requiriráselle que a emende a través da súa presentación electrónica. Para este efecto, considerarase como data de presentación aquela na que se realizase a emenda.

Décima. Trámites administrativos posteriores á presentación de solicitudes e emenda destas

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráselle que, se non o fai, se entenderá que desiste da súa solicitude, que se arquivará sen máis trámites.

Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a



normativa reguladora do procedemento concreto para o que se vaian empregar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos de forma electrónica ou presencial, segundo a normativa reguladora do procedemento do que se trate. No formulario deberá indicarse, no seu caso, o procedemento para o que se está a efectuar o trámite. Os modelos están dispoñibles en:

<https://sede.depo.gal/web/public/dynamic/catalogo/tramitesxenericos>

Décimo primeira. Notificacións

As notificacións de resolucións e actos administrativos realizaranse só por medios electrónicos, nos termos previstos na normativa reguladora do procedemento administrativo común; estas practicaranse a través da Dirección Electrónica Habilitada única, accesible desde <https://sede.depo.gal> e <https://dehu.redsara.es>.

As notificacións entenderanse practicadas no momento no que se acceda ao seu contido e rexeitadas cando transcorresen dez (10) días naturais desde a posta á disposición da notificación sen que se acceda a este.

O sistema remitiralles ás persoas interesadas avisos da posta á disposición das notificacións á conta de correo electrónico indicada na solicitude. Estes avisos non terán en ningún caso efectos de notificación practicada e a súa falta non impedirá que a notificación sexa considerada plenamente válida.

Se o envío electrónico non fose posible por problemas técnicos, a Deputación de Pontevedra realizará a notificación polos medios previstos na normativa reguladora do procedemento administrativo común.

Décimo segunda. Procedemento de concesión

O procedemento de concesión das subvencións levarase a cabo en réxime de concorrencia competitiva; é dicir, mediante a comparación das solicitudes presentadas co fin de establecer unha prelación entre elas, de acordo cos criterios de valoración fixados nestas bases e na convocatoria, e concederánselles ás solicitudes que obteñan maior puntuación, con cargo ao crédito dispoñible.



O importe individual das subvencións determinarase en función da puntuación obtida conforme aos criterios de valoración e ao sistema de distribución previsto na convocatoria; establecerase un importe máximo por entidade en cada liña e, en todo caso, a axuda non poderá superar o 80 % do orzamento presentado coa solicitude. Realizada a asignación inicial, de existir crédito sobrante como consecuencia da aplicación dos límites anteriores, este redistribuirase mediante repartición sucesivas entre as solicitudes beneficiarias que non acadasen os devanditos límites, e aplicarase o mesmo criterio de distribución, ata esgotar o crédito ou ata que todas as solicitudes beneficiarias acaden os límites establecidos.

Os importes máximos de subvención por entidade serán os seguintes:

Liña 1: ámbito inferior ao estatal.....	3.000,00 €
Liña 2: fútbol Preferente Galicia	6.000,00 €

No caso de que, tras a aplicación dos criterios e límites, non se esgotase o crédito asignado a unha liña, o remanente poderá incorporarse á outra liña para a súa distribución.

Décimo terceira. Criterios de valoración

Co obxecto de garantir unha valoración obxectiva para calcular os importes, estableceranse os criterios do orzamento achegado coa solicitude e do certificado federativo (anexo I); seguirase a seguinte ponderación:

Criterios de valoración específicos	Ponderación
Orzamento da finalidade subvencionada	50 %
Licenzas federativas	50 %
Total	100 %



1) Determinación dos puntos:

O procedemento para determinar os puntos acadados por cada entidade determinarase mediante a seguinte fórmula:

$$\text{Puntos de cada entidade} = (\text{Ov} * 50 / \text{Sto}) + (\text{Lf} * 50) / \text{Slf}$$

Ov: orzamento valorado

Sto: sumatorio do total de orzamentos valorados

Lf: puntuación acadada por licenzas federativas

Slf: sumatorio das puntuacións totais das licenzas federativas

Orzamentos máximos valorados:

- Máximo valorado en ámbito inferior ao estatal.....3.000,00 €
- Máximo valorado en Preferente Galicia.....10.000,00 €

2) Cálculo da puntuación a través das licenzas federativas:

Licenzas totais da entidade	1 punto/licenza
Licenzas formativas (categorías de base ata os 16 anos)	1 punto/licenza
Licenzas femininas	1 punto/licenza
Licenzas de deporte adaptado	10 puntos/licenza
Licenzas de técnicos ou adestradores	
➤ Nivel 3	5 puntos/licenza
➤ Nivel 2	3 puntos/licenza
➤ Nivel 1	1 punto/licenza
Licenzas de técnicas ou adestradoras	
➤ Nivel 3	7 puntos/licenza
➤ Nivel 2	5 puntos/licenza
➤ Nivel 1	3 puntos/licenza



3) Cálculo do valor do punto das axudas das subvencións:

O valor do punto calcularase dividindo o orzamento destinado á modalidade entre 100.

4) Cálculo do importe das subvencións:

O importe final das subvencións calcularase multiplicando a puntuación acadada por cada entidade polo valor do punto das axudas.

Décimo cuarta. Instrución do procedemento

A instrución do procedemento de concesión de subvencións correspóndelle ao Servizo de Deportes.

Comprenderá as seguintes fases:

- Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
- Informe-proposta da xefa ou xefe de servizo no que figure a valoración das solicitudes, de acordo cos criterios de concesión, se explique o sistema de valoración seguido, se relacionen as solicitudes por orde e se sinale a subvención correspondente a cada unha delas. Así mesmo, relacionaranse as solicitudes desestimadas e explicaranse as razóns da súa desestimación.
- Fiscalización dos expedientes por parte da Intervención.
- Informe-proposta por parte da Comisión de Valoración, que estará composta por:
 - Presidenta ou presidente: a xefa ou xefe do Servizo de Deportes.
 - Vogal: un membro do persoal técnico do Servizo de Deportes.
 - Secretaria ou secretario: unha funcionaria ou funcionario do Servizo de Deportes.
- Unha vez examinados os expedientes e o informe-proposta, o órgano instrutor formulará unha proposta de resolución provisional debidamente motivada, que se lles notificará ás entidades interesadas mediante a súa publicación na Sede electrónica da Deputación de Pontevedra. As entidades disporán dun prazo de dez (10) días naturais, contados desde o día seguinte ao da publicación, para presentar os certificados federativos (aquelas entidades que presentasen unha declaración xurada no momento da solicitude),



alegacións ou a renuncia á subvención proposta. En caso de non haber modificacións, a proposta elevarase a definitiva.

- Informe-proposta dos expedientes que presenten alegacións ou renuncias.
- Proposta de resolución definitiva. Logo de examinadas as alegacións e as posibles renuncias, formularase a proposta de resolución definitiva, que deberá expresar a persoa solicitante ou a relación de solicitantes para as que se propón a concesión da subvención e a súa contía. Tamén recollerá as solicitudes rexeitadas e os motivos da súa exclusión.
- As propostas de resolución provisional e definitiva non crean dereito ningún a favor da persoa beneficiaria proposta fronte á Administración mentres non se lle notifique a resolución de concesión.
- Informe de fiscalización da Intervención de todos os expedientes e da proposta de resolución definitiva.

Décimo quinta. Resolución do procedemento

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.

O acto de resolución do procedemento publicarase no BOPPO e terá os efectos dunha notificación por tratarse dun procedemento por concorrencia competitiva (artigo 45 da LPACAP).

Ademais, publicarase na páxina web da Deputación de Pontevedra.

O prazo máximo para resolver e notificar a resolución do procedemento non poderá exceder os seis (6) meses, contados a partir do día seguinte a aquel no que finalice o prazo de presentación das solicitudes. O vencemento do prazo máximo sen notificar a resolución lexitima as persoas interesadas para entender desestimada por silencio administrativo a solicitude de concesión da subvención.

Décimo sexta. Compatibilidade e incompatibilidade

A subvención será compatible con outras subvencións, axudas, ingresos ou recursos para a mesma finalidade, procedentes de calquera Administración ou ente público ou privado.



Segundo o disposto no artigo 19.3 da LXS e no artigo 17.3 da LSG, "o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada".

A subvención será incompatible con calquera subvención para a mesma persoa beneficiaria e a mesma finalidade, con cargo a créditos desta Deputación e dos seus organismos dependentes, en especial, coas convocatorias de subvencións a entidades deportivas da provincia de Pontevedra de ámbito estatal, de ámbito náutico, e coas consignadas nominativamente no Orzamento para o ano 2026 da Deputación de Pontevedra.

Décimo sétima. Procedemento de xustificación e pago

As entidades deberán xustificar que cumpren a finalidade, acadan os obxectivos, aplican os fondos e as demais obrigas impostas coa concesión da subvención.

A xustificación poderá presentarse a partir do día seguinte ao da publicación da resolución de concesión definitiva das subvencións no BOPPO. O prazo de presentación das xustificacións finalizará o 31 de xaneiro de 2027.

Para a xustificación, as entidades beneficiarias deberán presentar, obrigatoriamente por medios electrónicos e a través do modelo normalizado, a seguinte documentación:

- Anexo II. Conta xustificativa de gastos e ingresos

Na xustificación de gastos relacionaranse os conceptos de gastos por un importe igual ou superior ao orzamento presentado coa solicitude:

- En caso de que se xustifiquen gastos por un importe igual ou superior ao do orzamento presentado, aboarase a totalidade da subvención.
- En caso de que se xustifiquen gastos inferiores ao 100 % e iguais ou superiores ao 50 % do orzamento presentado, aboarase a parte proporcional da subvención.
- En caso de que se xustifiquen gastos inferiores ao 50 % do orzamento presentado, non se considerará cumprida a finalidade básica da subvención, polo que non se aboará cantidade ningunha.
- Na conta xustificativa especificaranse as facturas presentadas para xustificar a subvención concedida e declararase que esas facturas non se utilizaron para xustificar outras subvencións.



- En caso de que se precisase detallar máis facturas, utilizarase o documento de continuación da conta xustificativa (anexo III).

Na xustificación de ingresos relacionaranse as axudas concedidas por outros organismos públicos para a finalidade subvencionada e declarárase que o importe das subvencións concedidas por outros entes públicos e os fondos propios ou privados para a actividade subvencionada non superaron o importe total dos gastos para a dita actividade.

En caso de que coa suma da subvención concedida e dos ingresos doutras subvencións ou axudas as entidades deportivas superasen o custo da finalidade subvencionada ou obtivesen beneficios, aboarase a parte proporcional da subvención para que non se supere o custo da actividade subvencionada.

- **Xustificación con facturas**

As entidades beneficiarias presentarán facturas ou documentos análogos con valor probatorio no ámbito mercantil e administrativo polo importe da subvención concedida.

- **Anexo IV. Memoria de publicidade**

Memoria na que se xustifiquen as medidas de publicidade e difusión da subvención, por medio de fotografías que mostren de forma clara e inequívoca cada unha das actuacións requiridas.

- En caso de que as entidades non xustificasen correctamente as medidas de publicidade e difusión, o Servizo de Deportes poderá establecer unha dedución máxima de ata o 10 % sobre o importe da subvención. Para a imposición destas deducións non será preciso tramitar un procedemento especial distinto ao da xustificación da subvención; o pago desta farase descontando o importe da dedución do importe concedido.
- A falta de xustificación total das medidas de difusión dará lugar á perda total do dereito ao cobro da subvención.

Outras normas que se deben ter en conta na xustificación:

- Os gastos presentados na conta xustificativa deberán pagárselles ás súas respectivas proveedoras e provedores antes de presentar a xustificación da subvención. En caso de que a entidade deportiva non dispuxese de fondos nese momento, terá un prazo máximo dun



(1) mes desde que perciba a subvención para efectuar eses pagos. Se posteriormente, mediante control financeiro, se comprobase que algún dos gastos non se pagou ou se fixo fóra de prazo, este deixará de ser subvencionable.

- As entidades beneficiarias das subvencións provinciais deben empregar, con carácter xeral, formas de pago a terceiras persoas que poidan acreditarse mediante un documento expedido por unha entidade financeira no que queden identificados a persoa beneficiaria, o importe e mais a data de pago (tarxetas bancarias de crédito ou débito, talóns nominativos, transferencias bancarias etc.); só excepcionalmente, cando non sexa posible outra forma alternativa, poderá empregarse o pago en metálico. O incumprimento desta disposición para algún gasto que supere o importe de 900,00 euros implicará que este se considere non subvencionable.
- En caso de entidades que non teñan contabilidade, os gastos que non se paguen mediante unha entidade financeira non se considerarán subvencionables.
- Unha vez vencido o prazo de xustificación sinalado nestas bases ou, no seu caso, o establecido na prórroga sen que a entidade beneficiaria presente a documentación xustificativa, o Servizo de Deportes requiriralle que o faga no prazo improrrogable de quince (15) días. O feito de non presentar a documentación neste prazo suporá a perda do dereito a cobrar a subvención e as demais responsabilidades previstas na LXS.

O pago das subvencións farase unha vez aprobada a xustificación, mediante transferencia bancaria á conta sinalada na solicitude, que deberá estar a nome da entidade beneficiaria.

Para aboar a subvención, as entidades beneficiarias deberán estar ao corrente no cumprimento das súas obrigas tributarias coa Axencia Estatal de Administración Tributaria (AEAT), coa Axencia Tributaria de Galicia (ATRIGA), coa Tesourería Xeral da Seguridade Social e coa Deputación de Pontevedra. No caso das subvencións da liña 1, a acreditación deste cumprimento poderá realizarse mediante a declaración responsable recollida no anexo II.

Décimo oitava. Obrigas en materia de publicidade e deducións por incumprimento

As entidades beneficiarias destas axudas deberán levar a cabo as seguintes actuacións en materia de difusión e publicidade para cumprir coas condicións establecidas. O incumprimento



das medidas podería establecer deducións dunha porcentaxe da subvención concedida, segundo se detalla a continuación:

1. Roupa e equipamento de competición e adestramento (dedución máxima do 5 % en caso de incumprimento):

Inclusión do logo	Entidades da liña 1 > 1.500 €	Entidades da liña 2	Dedución por incumprimento
Roupa de competición	Inclusión do logotipo da Deputación	Inclusión do logotipo da Deputación	- Se non ten logo, un 3 %
Roupa de adestramento ou viaxe	Opcional	Inclusión do logotipo da Deputación	- Se non ten logo, un 1 %
Roupa de competición do resto de equipos	Opcional	Obrigatorio se estivese presente calquera outra Administración	- Se non ten logo, un 1 %

2. Espazos físicos e dixitais (dedución máxima do 5 % en caso de incumprimento):

- Entidades deportivas con instalacións: as entidades deportivas que leven a cabo a súa actividade deportiva nunha instalación (pavillóns, pistas, piscinas etc.) deberán colocar un número mínimo de lonas publicitarias nas súas instalacións, en lugares estratéxicos nos que se asegure a súa visibilidade durante as competicións e adestramentos. Ademais, deberán garantir a presenza dixital da Deputación na páxina web e nas redes sociais oficiais da entidade.

Espazos físicos e dixitais	Entidades da liña 1 > 1.500 €	Entidades da liña 2	Dedución por Incumprimento
Lonas publicitarias	Mínimo de 1 lona 3 x 1 m	Mínimo de 2 lonas 3 x 1 m	- Por cada lona que non estea colocada, un 2 %
Páxina web e redes sociais	Deberá estar na páxina web e redes sociais	Deberá estar na páxina web e redes sociais	- Se non está, un 1 %

- Entidades deportivas sen instalación: as entidades deportivas que leven a cabo a súa actividade deportiva fóra dunha instalación (ciclismo, automobilismo, *trail*...) deberán



incluir o logotipo da Deputación nos vehículos de competición e nos vinculados á entidade. Ademais, garantirán a presenza dixital da Deputación na páxina web e nas redes sociais oficiais da entidade.

Espazos físicos e dixitais	Entidades da liña 1 > 1.500 €	Dedución por incumprimento
Vehículos da entidade	Inclusión do logotipo da Deputación	- Se non está, un 2,5 %
Páxina web e redes sociais	Deberá estar na páxina web e redes sociais	- Se non está, un 2,5 %

En caso de incumprimento das medidas publicitarias establecidas, as entidades deberán presentar unha xustificación detallada na que se expliquen as razóns deste. Esta xustificación será avaliada pola entidade subvencionadora e poderá dar lugar a unha revisión da axuda. Así mesmo, se as entidades deportivas levan a cabo outras accións publicitarias adicionais non contempladas nestas bases, deberán garantir que a Deputación, do mesmo xeito que outras administracións públicas que participen, sexa incluída nas devanditas accións publicitarias, respectando sempre o principio de proporcionalidade en función da achega de cada Administración.

No caso das subvencións de menos de mil cincocentos euros (1.500,00 €), só se terá que xustificar a difusión por medio dalgún dos apartados antes citados.

Todos os gastos derivados da produción dos elementos publicitarios mencionados correrán a cargo da entidade subvencionada, que se compromete a actualizar todos estes soportes publicitarios antes de presentar a xustificación.

De non incluír a imaxe da Deputación de Pontevedra nos termos establecidos, debido ás características da modalidade deportiva ou a calquera outra circunstancia, deberase propoñer unha alternativa, que será estudada polo Servizo de Deportes, para posteriormente propoñer a súa aprobación ou unha dedución da subvención.

A Deputación de Pontevedra poñerá á disposición das entidades subvencionadas os logotipos oficiais da imaxe corporativa en www.depo.gal (área de descargas).



As entidades solicitantes deberán ter en conta para futuras actuacións estas medidas de difusión á hora de deseñar novos equipamentos ou calquera outra medida.

Décimo novena. Obrigas das entidades beneficiarias

Ademais das obrigas previstas no artigo 14 da LXS, as entidades beneficiarias terán que cumprir:

- As medidas de publicidade e difusión, nos termos regulamentariamente establecidos nestas bases.
- Os demais supostos previstos nesta normativa reguladora das subvencións.
- As entidades beneficiarias deberán aprobar a liquidación da tempada. O acordo deberá aprobalo a asemblea ou o órgano competente da entidade deportiva, e deberán indicar de xeito expreso no acordo e con carácter mínimo o importe total dos gastos e dos ingresos e o resultado da tempada. Ao abeiro do disposto no artigo 56 da LXS, o incumprimento desta obriga formal será considerado como infracción leve, aspecto que se comprobará posteriormente en caso dun control financeiro.

Vixésima. Reintegro ou perda do dereito ao cobro da subvención

As subvencións concedidas deberán reintegrarse cando as causas sexan posteriores ao pagamento destas.

Perderase o dereito a cobrar a subvención, total ou parcialmente, no suposto de falta de xustificación ou de concorrencia dalgunha das causas previstas na lexislación de subvencións e, en concreto, nos seguintes supostos:

- Por incumprir as obrigas establecidas con motivo da concesión da subvención.
- Por incumprir as obrigas de xustificación.
- Por incumprir as obrigas relativas ás medidas de difusión do financiamento público recibido.
- Polas demais causas establecidas na normativa de subvencións.



Vixésimo primeira. Control financeiro

A entidade beneficiaria, de acordo co establecido nos apartados 5 e 6 do artigo 31 da Ordenanza xeral de subvencións da Deputación, publicada no BOPPO núm. 249, de 30 de decembro de 2016, estará suxeita ao control financeiro que se poida exercer, no prazo de catro (4) anos, contados desde o pago da subvención, e indicaráselle que, en caso de non ter contabilidade fiable, só serán subvencionables os gastos que se poidan acreditar mediante extractos bancarios (independentemente do importe destes).

O control financeiro fará referencia a todos os gastos e ingresos da actividade subvencionada, que deberá integrar a totalidade de gastos finais resultantes dos gastos subvencionables presentados coa solicitude, así como o resto de gastos que a entidade estime imputables á tempada (posibles gastos que non se reflicten na solicitude).

Esta contabilidade deberá estar reflectida nos libros contables co total de gastos e de ingresos; en caso de ser positiva, a entidade deberá reintegrar o importe resultante, conforme á lexislación vixente, na que se indica que o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

É importante determinar o inicio e a finalización da tempada e os gastos e ingresos que se lle imputan, especialmente en caso de que existan outras actividades complementarias, compatibles co seu obxecto social, de carácter industrial, comercial ou de servizos, e destinar os seus bens ou recursos a estes obxectivos (como poden ser escolas deportivas, eventos, campus deportivos...). Estas actividades deberán reflectirse nos libros contables de maneira independente e, en caso de que a entidade presentase un balance anual positivo, quedará reflectido a que actividade se imputa ese superávit.

Vixésimo segunda. Órgano de aprobación

De acordo co establecido na base 16.2 das Bases de execución do Orzamento vixente e no artigo 18 da LXS, o órgano competente para aprobar estas bases é a Xunta de Goberno.



Vixésimo terceira. Dereito supletorio

Para o non disposto nestas bases, contemplárase o establecido no artigo 4 da Ordenanza xeral de subvencións da Deputación de Pontevedra.

Vixésimo cuarta. Publicidade da convocatoria

Estas bases reguladoras publicaranse no BOPPO e en <https://sede.depo.gal>.

Por outra banda, de conformidade co previsto nos artigos 17.3.b e 20.8.a da LXS, o texto da convocatoria remitiráselle á BDNS para a súa publicación nela, que será a que lle dea traslado do seu extracto ao BOPPO.

Vixésimo quinta. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionalo, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado "Normativa aplicable", dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

